

**ZAPISNIK  
SA 21 PROŠIRENE SJEDNICE UPRAVNOG ODBORA  
UDRUŽENJA POSLODAVACA FBIH**

**koja je održana dana 26.09.2019. godine (četvrtak), sa početkom u 11:30 sati, u prostorijama ASA Prevent grupacije (Bulevar Meše Selimovića 16) u Sarajevu.**

**Sjednici su prisustvovali članovi Upravnog odbora UPFBiH:** Adnan Smailbegović, Safudin Čengić, Nijaza Skenderagića, Eldin Hadžiselimović, Kemala Čolaka

**Sjednici su po ovlaštenju članova Upravnog odbora UPFBiH prisustvovali:** Mirza Kasum (po ovlaštenju Rusmira Hrvica), Senad Beganović ( po ovlaštenju Snježane Kopruner), Kasim Kotorić (po ovlaštenju Adise Karahodžić), Miralem Šabović ( po ovlaštenju Suhada Eće), Alija Čolaković (po ovlaštenju Nurdina Peštalića), Darko Josipović ( po ovlaštenju Tomislava Sliškovića)

**Sjednici nisu prisustvovali članovi Upravnog odbora UPFBiH:** Krasnodar Darko Petrović, Vilim Primorac, Mario Čulina, Ramiz Grapkić, Senada Olević, Ante Suton, Šejla Bojadžija, Mario Raspudić, Kemal Hrnjić i Stjepan Kumrić.

**Sjednici su pored članova UO** prisustvovali Goran Mirašić, predstavnik Vlade Federacije BiH, predsjednici grupacija, članovi ESV-a i članovi UPFBiH sa područja Kantona Sarajevo.

**Ispred UP FBiH:** Mladen Pandurević i Mersiha Jusić.

Sjednicu je otvorio predsjednik Upravnog odbora UP FBiH Adnan Smailbegović i predložio slijedeći:

**DNEVNI RED**

1. Usvajanje Zapisnika sa 20 proširene sjednice Upravnog odbora UPFBiH;
2. Zauzimanje stava UPFBiH i informacija o trenutnom statusu i daljim aktivnostima Inicijative UPFBiH 20+5+6;
3. Razmatranje drafta Zakona o ustupanju radnika koji je pripremljeno UPFBiH;
4. Razmatranje drafta Zakona o jedinstvenom sistemu za multilateralne kompenzacije i cesije koji je pripremljeno UPFBiH;
5. Tekuća pitanja

**RASPRAVLJANJE PO TAČKAMA DNEVNOG REDA:**

**Tačka 1. Usvajanje zapisnika sa 20 proširene sjednice UO UP FBiH**

Predsjednik je obavijestio članove UO UP FBiH da su dobili materijale za sve tačke dnevnog reda uključujući i Zapisnik i zamolio da se izjasne da li imaju primjedbi. Također je napomenuo da je zapisnik dostavljen odmah nakon održavanja sjednice svim članovima UO i da na pomenuti zapisnik nije bilo pismenih primjedbi

**A.D.1.: Zapisnik sa 20. proširene sjednice UO UP FBiH je jednoglasno usvojen.**

**Tačka 2. Zauzimanje stava UPFBiH i informacija o trenutnom statusu i daljim aktivnostima Inicijative UPFBiH 20+5+6;**

Vezano za ovu tačku dnevnog reda predsjednik je upoznao prisutne o proteklim aktivnostima i riječ dao predstavniku Vlade Goranu Mirašćiću.

Goran Mirašćić je upoznao prisutne da upravo dolazi sa sjednice Vlade FBiH na kojoj su usvojeni Amandmani Vlade FBiH na Zakon o porezu na dohodak i Zakon o doprinosima koji će biti na sjednici Parlamenta koja je zakazana za 09.10.2019. godine.

Predstavnik Vlade FbiH je upoznao prisutne da je zbirna stopa doprinosa u odnosu na prvobitni prijedlog koji je u Parlamentu sa 33,5 smanjena na 32,5 i to 18% na PIO, 13,5 zdravstvo% i 1% za nezaposlenos. Što se tiče poreza na dohodak istakao je da se postigao kompromis da dohodak do 800 KM bude odbitak odnosno neoporeziv te da sve preko 800 KM i sve druge vrste primanja budu oporezive sa jedinstvenom stopom od 13%. Također, uvodi se stopa na dividendu koja će biti 10%. Ovo su amandmani koje je Vlada usvojila na svojoj sjednici.

Što se tiče Zakona o računovodstvu predsjednik je izvjestio prisutne da su neki od amandmana UPFBiH usvojeni kao što su cjenovnici, povećanja praga za obveznike revizije. Također veoma bitna informacija da premijer Vlade FBiH podržava izmjene Zakona o porezu na dobit koje je predložilo UPFBiH u smislu olakšića po osnovu reinvestiranja.

Nakon uvodnog izlaganja predsjednik je otvorio raspravu. U raspravi koja je bila veoma konstruktivna i otvorena učestvovali su svi prisutni.

Eldin Hadžiselimović je istakao da je veoma bitno da se zakonski reguliše obaveza postepenog smanjivanja doprinosa u odnosu na rast prihoda. Te da se ta materija obavezno definiše Zakonom.

Kasim Kotorić je izrazio svoje nezadovoljstvo ovakvim nastupom predstavnika Vlasti istakao da će usvajanjem predloženih Zakona najveću štetu imati poslodavac te da je ovo nulta situacija gdje nema rasterećenja. Također oporezivanje svih naknada je rješenije koje poslodavci ni u kom slučaju ne podržavaju i u ovakvim rješenjima ne može se dobiti podrška poslodavaca.

Muhamed Pilav je istakao da već 15 godina poslodavci se pokušavaju dogovoriti sa Vladom o poboljšanju poslovnog ambijenta ali da to nije uspjelo niti sa jednom Vladom. Uvijek su rezultati bili loši. Očito je da je ovo maksimum Vlade. Kada je usvojen Zakon o PDV-u prognoze su bile da će biti milijarde maraka. Međutim svjedoci smo da nije došlo do tako velikog povećanja. Također, izrazio je svoju bojazan da će u narednih 5 godina biti izgubljeno 5.000 radnih mjesta, te da BiH privrednici nisu konkurentni u EU. Kratkoročno će fondovi imati 500 do 600 miliona KM a obrnuto će biti nakon 2 godine. Samo nova radna mjesta mogu da obezbijede punjenje budžeta, a ovakvi prijedlozi Zakona zaista neće dovesti niti do rasterećenja privredni niti povećanja zaposlenosti. Nama trebaju drakonske mjere za očuvanje privrede.

Hamed Šivšić je istakao da poslodavci ni u kom slučaju ne smiju i neće podržati neutralan efekat.

Miralem Šabović je istakao da je potrebno obezbijediti prelazni period za isplatu dividendi.

Kemal Čolak je naglasio da je hitno potrebno restrukturiranje javnih preduzeća, te da ovakav prijedlog Vlade nije prihvatljiv za poslodavce.

Alija Budnjo je istakao da postoji svi uslovi da se doprinosi smanje na 29% te da poslodavci ne trebaju odustati od tog zahtjeva. U tom slučaju došlo bi do povećanja zaposlenosti, smanjenja sive ekonomije a što će imati za rezultat punjenje budžeta.

Salih Lemeš je istakao da je u periodu kada se razgovaralo o prijedlogu Zakona koji je sad u proceduri uslovi za poslovanje su bili dosta drugačiji. Mnogi poslodavci su uložili u opremu da bi bili konkurentni, jer nisu u prilici da stvaraju akumulaciju. Također bonitetne kuće i u inostranstvu ne daju robu na odgodu jer BiH nije država koja je povoljna za bonitete. Dakle, poslovanje i uslovi poslovanja su se mnogu promijenile u odnosu na vrijeme kada je bio pripremljen prijedlog ovih Zakona te smatra da se sve promjenjene okolnosti trebaju uzeti u obzir prilikom donošenja Zakona.

Direktor Mladen Pandurević je istakao da poslodavci moraju imati garanciju u zakonu da će se trend smanjenja doprinosa nastaviti te da je potrebno tražiti hitni sastanak sa ministricom finansija i premijerom Vlade FBiH. Također, moramo tražiti garanciju da će Zakon o izmjenama Zakona o porezu na dobit ići u hitnu proceduru. Takoer potrebno je rasterećenje privrede u pogledu parafiskalnih nameta, zdravstvene zaštite i dr.

Ljiljana Krunosić je istakla da će najveći problem biti na malim primanjima te da tu poslodavac uopšte nema rasterećenja. Istakla je da je potrebno pronaći pravo rješenje. Prijedlozi Zakona kao ni amandmani Vlade nisu rješenje za rasterećenje privrede.

Mirza Kasum je istakao da će u kompanijama koje imaju plaće, koje su malo veće od minimalne plaće, doći do poskupljenja gotovog proizvoda. Na ovaj način će doći do nekonkurentnosti, poslodavci će biti prinuđeni povećati plaće i na taj način doći će do smanjenja radnih mjesta. Postavlja se pitanja opstanka industrijske privrede? Dakle neutralni efekat će imati negativni utjecaj na industrijski sektor.

Ljiljana Kunosić je postavila pitanje da li postoje ikakvi mehanizmi da Vlada uvaži zahtjeve poslodavaca i da navedeni Zakoni ne budu usvojeni u ovakvom tekstu kakav je predložen?

Predstavnik Vlade Goran Mirašić je na kraju istakao da je ovo prvi korak u rasterećenju privrede te da se svakako slaže da se mora iznaći zajedničko rješenje za postepeno smanjenje doprinosa. Također je istakao da ovo rasterećenje nije nulti efekat . Nulti efekat je na 35% a sada ćemo ići na 31,5%. Također je istakao da predloženi Zakoni korak u dobrom smjeru te da ih treba podržati i Vladi FBiH je jako stalo da dobiju podršku od UPFBiH, a da postepeno smanjenje odnosno stepanje bude obezbijedeno kroz zakonsko rješenje. Smatra da se ova dva dokumenta trebaju podržati te da se za narednu sjednicu traži usvajanje drugih zakona iz seta zakona Inicijative UPFBiH 20+5+6.

Nakon veoma otvorene rasprave donesen je sljedeći zaključak:

#### **A.D. 2.1.**

**Udruženje poslodavaca u FBiH ne podržava ovakve prijedloge Zakona. Predloženi tekstovi Zakona o porezu na dohodak i Zakona o doprinosima su jedino prihvatljivi uz uslov da se u zakonu ugradi odredba koja će garantovati postepeno smanjenje doprinosa u narednim godinama nakon stupanja na snagu Zakona, te da postepeno smanjenje doprinosa treba ograničiti na 28%. U protivnom UPFBiH ne podržava predložene tekstove Zakona.**

**A.D. 2.2. Zakon o izmjenama i dopunama Zakona o porezu na dobit treba ići u setu sa ova dva Zakona, odnosno ukoliko se ova dva Zakona usvoje bez Zakona o porezu na dobit onda Zakon o izmjenama Zakona o porezu na dobit treba biti na prvoj narednoj sjednici Parlamenta FBiH, kao i Zakon o zdravstvenom osiguranju.**

**A.D. 2.3. Treba obezbijediti da dividenda nema retroaktivnu primjenu te obezbijediti prelazni period za isplatu dividendi.**

**A.D. 2.4. Potrebno je zatražiti sastanak sa ministricom finansija i premijerom Vlade FBiH na kojem će razgovarati o zahtjevima poslodavaca.**

**Tačka 3. Razmatranje drafta Zakona o ustupanju radnika koji je pripremljeno UPFBiH;**

Vezano za ovu tačku dnevnog reda direktor je upoznao prisutne da je Zakon pripremljena radna grupa koju je imenovao UO, te da je zakon razmotren na Pravnom i Ekonomskom savjetu UPFBiH. Također je istakao da je ova materija koju je potrebno hitno definisati te predložio UO da usvoje predloženi tekst koji bi trebalo uputiti Ministarstvu za rad i socijalnu politiku u okviru Inicijative 20+5+6.

**A.D. 3.1. Draft Zakon podržan o strane UO uz zaključak da se u narednom periodu uputi Ministarstvu za rad i socijalnu politiku FBiH.**

**Tačka 4. Razmatranje drafta Zakona o jedinstvenom sistemu za multilateralne kompenzacije i cesije koji je pripremljeno UPFBiH;**

Vezano za ovu tačku direktor je istakao da je Draft Zakona pripremljen od strane radne grupe te da je usaglašen sa predstavnicima FIA-e budući da će FIA biti organizator sistema.

Također je istakao da je razmatran na Pravnom i Ekonomskom savjetu te da su na tom sastanku postojale određene dileme u vezi sa tim Zakonom. Zamolio je predsjednicu Ekonomskog savjeta gđu. Mubera Brković da upozna članove UO sa pitanjima koja su sporna.

Mubera Brković je upoznao prisutne sa pitanjima koja su predstavljala dilemu.

**A.D. 4.1. Draft Zakona podržan uz zaključak da će u Zakon biti ugrađene primjedbe koje budu dostavljene od strane gđe. Mubere Brković. Imajući u vidu da je gđa. Mubera uključena u ovu problematiku Zakon treba uputiti prema nadležnom Ministarstvu uz ugrađene primjedbe koje budu dostavljene.**

Pod tekućim pitanjima nije bilo rasprave.

Sjednica se završila u 14:00 sati

Predsjednik UO

Zapisnik sačinila: Mersiha Jusić

Adnan Smailbegović